

**Date – 08/05/2025**

**Time - 7:30 -7:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Lai Autonomous District Council Chief Executive Member atan tukin khan MDC Pu N Zangura chu ruinawmna thu tiamtira lakluh a ni.
2. Union Minister of State for MSME and Labour & Employment Pi Shobha Karandlaje chuan nimin khan Khawzawl district a tlawh
3. Operation Sindoor beihpui thlak anih hnuah boruak ti sosang zawnga Pakistan a che anih chuan India chuan chhanglet turin a inpuahchah tha tawk tih a sawi.
4. Sawrkar laipui chuan vawiin hian Operation Sindoor chungchangah political party tin aiawhte inhmukhawm a ko.

<><><>

**LADC**

Lai Autonomous District Council Chief Executive Member atan tukin khan MDC Pu N Zangura chu rinawmna thu tiamtira lakluh a ni.

Kan corr report lo ngaithla ang.

CEM lakluh tur hi Lai Students' Association (LSA) General Hqrs. ten dan an tum ni a hriat a nih avangin LADC Office Compex, Council Veng leh New Vengpuiah te BNSS hnuaiah ni 2 chhung punkhawm khap a ni.

District Magistrate thuchhuah tarlan danin, LADC Office Complex, Council Venga CEM thutiam lâkna dan tum nia hriat a ni a, hei bakah hian MPSC, UDC Combined Examination chu vawiin hian Lawngtlai Govt. Region Higher Secondary

School, New Vengpui ah neih tur a ni bawk a, hengte avang hian BNSS hnuaiah Council Veng leh New Vengpui huamchhungah mi panga aia tam punkhawm leh buaina siam khap tlat a ni.

Council Veng leh New Vengpui huamchhungah buaina siam zawngin tumah an khawsa tur a ni lo a, mi tina thei zawngin tumahin hriamhrei emaw thil dang an chelek tur a ni lo a ni.

Puan tawh angin, LADC-a sorkar mumal a din theih loh avangin boruak a tang chho reng a, BJP leh MNF thawhdunna, United Democratic Alliance CEM atan MDC Pu N Zangura Governor in a ruat hnuah vawiinah CEM atana lakluh tum a ni.

Hetih lai hian, Lai Autonomous District Council Sorkar buai mek chhan chu ZPM Legislature Party vang a ni, tih BJP leh MNF leh pawnlam atanga thlawptu Congress MDC ten an din United Democratic Alliance te chuan an sawi a, nimin khan Lawngtlai Press Club ah thuthar thehdarhtute kawmin, Lungtian bialtu MDC Pu Sanghuliana Mualchin chuan LADC ah ZPM Legislature Party ten Sorkarna siamthei khawp Member neilo chung a an kiang duhlo chu mipui zahlohna a an ngaih thu a sawi a, LADC Budget a hman theih loh bakah sorkar hnathawkin hlawn an la thei lo a, hei hi LADC Chairman leh Deputy Chairman chu Governor thu anga an kalloh vang a ni a ti a, mipui humhim aiin an dawhkan humhim tumin hma an la a ni a ti.

<><><>

GOVERNOR

Larsap General (Dr) Vijay Kumar Singh, Mizoram University Chief Rector chuan nimin khan 'National Workshop on AI-Driven Financial Empowerment for Mizoram' chu MZU Auditorium-ah a hawng.

Larsap hian Sawrkar laipui Department of Science and Technology hnuaia Tribal Area Sub Plan Scheme hmanga project leh entrepreneur tanpuina pekte tarlanna booklet a tlangzarh nghal bawk.

Sorkar laipui Department of Science & Technology, MZU leh IBITF, IIT Bhilai tangho buatsaih he workshop hi ni 2 aw h tur a ni a, Larsap chuan Artificial Intelligence tangkai taka hman a nih theih nana inzirtirna workshop buatsaih a ni chu lawmawm a tih thu sawiin, IIT Bhilai-in North Eastern Region tana Tribal Area Sub Plan Scheme hnuaia AI Driven Financial Technology Project 36 a kalpui zinga 11 lai mai Mizorama kalpui a ni chu lawmawm a tih thu a sawi a. AI tangkaina chuan thingtlang kilkhawr zawka chengte thlengpha ngei se a duh thu sawiin, mithiam kalkhawmte chu mipui nawlpui tana hriatthiam awlsam leh tangkai taka hman theih tur ngaihtuah chung a hma la turin a chah a, Project Investigator leh Co-Project

Investigator-te thawhrimna leh remhriatnate chu mipui tan vanneihna, hnathawh leh khawsak tiawlsamtu a la ni thuai dawn a ni, a ti bawk.

He huna tarlan a nih danin Department of Science and Technology (DST) kaihhruaina hnuaiah National Mission on Interdisciplinary Cyber-Physical Systems (NM-ICPS) chuan IIT Bhilai hnenah Technology Innovation Hub (TIH) host turin sum a pe a. Tunah hian IIT Bhilai hian Financial Technology huangah Mizoram University tan project 6 leh NIT Mizoram tan project 5 a ruahman a ni.

<><><>

**HIV ORPHANS DAY**

HIV/AIDS avanga naupang chanhaite enkawlna Gan Sabra chuan nimin khan Aizawla I&PR Auditorium-ah World AIDS Orphans Day an hmang a, Adviser to CM (Finance) Pu TBC Lalvenchhunga'n a hmanpui.

He hun hmanpuitu Pu TBC Lalvenchhunga chuan, thil tha ti turin sawrkar fawng chelhtu emaw, thuneihna sang tak neih kher a ngai lo tih sawiin, inpekna thuk tak nena hnathawhin awmzia a neiin, chu chu midang tan malsawmna a ni thin a ti a. Thil tha tih kawnga tan la zel turin kalkhawmte a chah a ni.

HIV/AIDS avanga naupang chanhaite Ni ah hian Mizoram State Child Protection hotute, HIV/AIDS vei te enkawlna lama hma latu tlawmngai pawl hrang hrang aiawhte, Home hrang hranga thawktute leh HIV/AIDS avanga harsatna tawk mi engemawzat an tel a ni.

Gan Sabra hi kum 2006 a din niin, HIV/AIDS avanga naupang chanhai leh harsatna tawk te enkawlna hmun a ni a. HIV/AIDS avanga harsatna tawk naupang 40 an enkawl mek a, naupang an enkawl tawh zingah hnathawka mahni intodelh, nursing zir mek leh zir chhuak tawh te pawh an awm a ni.

Gan Sabra hian Community Support and Sponsorship Programme (CSSP) an kalpui bawk a. Sponsorship kaltlang hian Aizawl, Lunglei, Champhai, Mamit, Kolasib, Serchhip leh Saitual District-ah HIV/AIDS avanga harsatna tawk naupang 264 leh chhungkua 118 tan tanpuina pein, an tlawhkual thin. Thla tin an zirna senso, ei leh in bakah damdawia inenkawlna an tumsak thin bawk.

Heng tanpuina bakah hian Anti-Retroviral Therapy (ART) damdawi pawh an semchhuak thin a, HIV/AIDS avanga nausen harsatna tawkte tan hnute tui (Formula Milk) te an pe thin bawk a ni.

Gan Sabra Chief functionary Lucy Remruati Chhangte chuan, Tanpuina hi Central atangin an dawng a, a tam lova, tun ang dinhmun an thlen theih chhan chu Mizorama kohhran, khawtlang, NGO leh mimal thahnemngai tanpuina min petute vang a ni, a ti.

<><><>

## UNION MoS VISITS KHAWZAWL

Union Minister of State for MSME and Labour & Employment Pi Shobha Karandlaje chuan nimin khan Khawzawl district a tlawh a, Khawzawl office hotute nen inkawmin Khawzawl leh Chawngtlai khaw hmun hrang hrang a tlawh bawk.

Union Minister Pi Shobha Karandlaje hi Khawzawl DC Pu K. Vanlalthiana leh hotu dang te'n an lo lawm a, District thuneitu hrang hrang ten district-a hmasawna hnathawh chungchang a sawi a, department hrang hrang hmalakna leh scheme hrang hrang tarlan niin Union Minister Pi Shobha Karandlaje chuan department hrang hrang zawhna a zawt a, hotute chu fuihin district tana theihtawp chhuah turin a sawm a ni.

Union Minister of State hian thawhlehi khan Lengpui Airport a lo thleng a, Sihmui, Sairang leh Ramhluna PMEGP hnuaia hmathatna dawngte a kawm nghal a, Minister chuan Sawrkar laipui ruahmanna hnuaia hamthatna dawngtuten an khawsak dinhmun chawikan nana PMEGP hnuaia eizawna ngelnghet an nei thei chu lawmawm a tih thu a sawi a, Sawrkar laipui scheme hrang hrang hnuaia hlawhtlinna changtu leh ram hmasawna thlentu nih tum tlat turin hamthatna dawngtute chu a chah a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## OPERATION SINDOOR

Operation Sindoor beihpui thlak anih hnuaah boruak ti sosang zawnga Pakistan a che anih chuan India chu chhanglet turin a inpuahchah tha tawh tih a sawi. Puan tawh angin Pakistan leh Jammu and Kashmir-a Pakistan luah chhunga firfiakte tan hmun pakua chu minute 25 chhungin kahchhiat a ni a. Pahalgam firfiaka chetna chhanletna anih thu sawrkar chuan a sawi a ni.

Nimin khan Indian Army, Indian Air Force leh External Affairs Ministry chuan chanchibumite hmaah he operation chungchang hi an sawifiah a. Foreign Secretary Vikram Misri chuan Pahalgam firfiaka chetna chhui anih hnuaah Pakistan-in firfiakte nen inzawmna an nei tih hmuhchhuah a ni a ti.

Operation Sindoor chunchang sawiin Colonel Sofia Qureshi chuan Indian Army ten target pakua an kap a ti a. Heng target te hi kahchhiat vek anih thu a sawi a. Pakistan-a firfiakte camp hi an kapchhia a ni a ti.

Indian Air Force Wing Commander Vyomika Singh pawhin Operation Sindoor chu Pahalgam firfiaka chetna tuartute tana rorelna dik pekna anih thu a sawi a ni.



**PARTY LEADERS**

Sawrkar laipui chuan vawiin hian Operation Sindoor chungchangah political party tin aiawhte inhmukkhawm a ko. He hunah hian party hruaitute chu Operation Sindoor chungchang hrilhfiah an ni ang.

Political Party hrang hrang hruaitute hian politics dah thain Operation Sindoor an fak a. Union Home Minister Amit Shah-a chuan Operation Sindoor chu Pahalgam-a pawisawi lo unaute rapthlak taka thah an nih chhanletna a ni ti. Defence Minister Rajnath Singh-a pawhin Indian sipaite chu fakawm atih thu a sawi a. External Affairs minister Dr.S.Jaishankar chuan khawvelin firfiaka chetna lakah ngaihnathiamna a lantir tur a ni lo tih a sawi bawk a ni.

Lok Sabha Opposition Leader Rahul Gandhi chuan India sipaite chu a chhuang hle tih social media ah a tarlang a. DMK leh Tamil Nadu CM MK Stalin,TDP Chief leh Andhra Pradesh CM N Chandrababu Naidu, TMC Chief leh West Bengal CM Mamata Banerjee, Samajwadi Party hotupa Akhilesh Yadav, RJD hruaitu Tejaswi Yadav leh BJD hruaitu Naveen Patnaik te pawhin India sipaite fakawm an tih thu an sawi.



**UNION HM**

Union Home Minister Amit Shah hoin nimin khan ramria awm state Chief Minister, DGP leh Chief Secretary te an thukhawm a. He hunah hian Jammu and Kashmir, Punjab, Rajasthan, Gujarat, Uttarakhand, Uttar Pradesh, Bihar, Sikkim, West Bengal leh Ladakh leh Jammu and Kashmir Lieutenant Governor te an tel a. Union Home Minister Amit Shah-a chuan Pakistan leh Nepal ramria awm state CM leh Lt.Governor te chu ram leh hnam kalh zawnga hmala an awm leh awm loh ngawrh taka vil turin a chah a ni.

